

## **HIRAJAN A/L GUDU**

**[Mahkamah Rayuan Syariah Negeri Sembilan, YAA Dato' Abas Bin Nordin (Pengerusi), YAA Dato' Dr. Haji Mohd. Na'im Bin Haji Mokhtar (Panel), YA Dato' Haji Hussin Bin Haji Harun (Panel) Pada 17 Julai 2020/25 Zulkaedah 1441H]**

**Kes Rayuan (*Mal*) No. 05000-043-0012-2018**

**[Permohonan pengisytiharan untuk meninggalkan agama Islam – subseksyen 61(3)(b)(x) dan 119 Enakmen Pentadbiran Agama Islam (Negeri Sembilan) 2003 [*Enakmen No. 10 tahun 2003*]]**

### **ALASAN PENGHAKIMAN**

[1] Kes ini adalah suatu rayuan terhadap keseluruhan keputusan Mahkamah Tinggi Syariah Seremban, Negeri Sembilan yang telah dikeluarkan pada 20/7/2018 yang menolak permohonan Perayu melalui kes Mal No. 05100-043-0580-2017.

#### **FAKTA KES**

[2] Perayu Hirajan A/L Gudu (No. K/P: 771103-02-6031) yang beralamat penyampaian di No. 6, Taman Bunga Raya, Kuala Sawan, 71200 Rantau, Negeri Sembilan telah memfailkan permohonan untuk mendapatkan pengisytiharan daripada Mahkamah Tinggi Syariah sebagai bukan Islam pada 11/12/2017.

[3] Perayu dilahirkan pada 3/11/1977 di Hospital Daerah Kulim, Kedah. Perayu merupakan seorang Islam dan berketurunan India Muslim. Bapa Perayu bernama Gudu A/L Mohamad manakala ibu Perayu pula bernama Norbee A/P Kader dan kedua-dua ibu bapa Perayu adalah beragama Islam. Dalam affidavit permohonannya Perayu hanya menyatakan satu (1) alasan sahaja untuk keluar Islam iaitu untuk membolehkan dirinya berkahwin dengan pasangannya yang beragama Hindu.

[4] Mahkamah Tinggi Syariah telah mengeluarkan keputusan seperti yang berikut:

1. *Permohonan Pemohon ditolak.*

[5] Perayu tidak berpuashati dengan keputusan YA Hakim Bicara tersebut dan memfailkan Notis Rayuan tanpa menggunakan khidmat Peguam Syarie. Perayu telah memplidkan 3 alasan rayuan pada 19/11/2019 di halaman 27-29 Rekod Rayuan sebagaimana yang berikut:

- i. Ibu Bapa Perayu sememangnya berbangsa India Muslim, akan tetapi sejak kecil Perayu suka bergaul dengan penganut beragama Hindu dan pernah bersembahyang di kuil berdekatan setiap minggu.
- ii. Perayu telah terpicat dengan agama Hindu dan ingin memeluk agama Hindu.
- iii. Perayu juga bercadang untuk berkahwin dengan seorang perempuan yang beragama Hindu dan sekarang ini sedang hamil.

## ULASAN MAHKAMAH RAYUAN

[6] Setelah kami meneliti keseluruhan rekod rayuan, kami dapati YA Hakim Bicara di akhir penghakimannya telah memutuskan bahawa Pemohon (Perayu) tidak mempunyai *locus standi* untuk meneruskan permohonannya dan Mahkamah menolak permohonan tersebut di peringkat awal tanpa perlu mengarahkan Pemohon menjalani proses seterusnya.

[7] Justeru itu, kami berpendapat hanya satu (1) isu yang sahaja yang perlu diberi perhatian dan diulas iaitu **sama ada Perayu mempunyai hak dari segi undang-undang dan hukum syarak untuk memfailkan permohonan atau sebaliknya.**

[8] Sebelum kami mengulas lanjut, suka kami merujuk firman Allah SWT dalam surah Ali-‘Imran ayat 85 yang berbunyi –

وَمَنْ يَبْتَغِ غَيْرَ الْإِسْلَامِ دِينًا فَلَنْ يُقْبَلَ مِنْهُ وَهُوَ فِي الْآخِرَةِ مِنَ  
الْخَسِرِينَ ﴿٨٥﴾

*Bermaksud: “Dan sesiapa yang mencari agama selain agama Islam, maka tidak akan diterima daripadanya, dan ia pada hari akhirat kelak dari orang-orang yang rugi.”*

[9] Berdasarkan firman Allah SWT di atas, kami menegaskan bahawa setiap Muslim berkewajipan menjaga agama Islam kerana ia adalah turutan pertama dalam tertib Maqasid As-Syariah, mendahului kewajipan menjaga nyawa, akal, keturunan (zuriat), maruah dan harta. Berbalik kepada kes rayuan di hadapan kami, permohonan Perayu sebelum ini adalah berkenaan dengan pengisytiharan untuk keluar daripada agama Islam sebagaimana yang diperuntukkan di bawah seksyen 119 Enakmen Pentadbiran Agama Islam (Negeri Sembilan) 2003 [*Enakmen No. 10 tahun 2003*]. Walau bagaimanapun, kami tidak mendapati dalam peruntukan tersebut ada menyentuh tentang peruntukan khusus tentang “*locus*” bagi seseorang yang berhasrat untuk membuat permohonan keluar Islam melainkan dalam pindaan seksyen 119 Enakmen yang sama pada tahun 2009. Kami merujuk subseksyen 119(2A)(i), Enakmen Pentadbiran Agama Islam (Negeri Sembilan) (Pindaan) 2009 [*Enakmen A4*] jelas menyatakan bahawa –

*(2A) Suatu permohonan bagi pengisytiharan di bawah subseksyen (2) boleh dibuat jika –*

- (i) Pemohon dilahirkan sebagai seorang Islam, dia hendaklah dilahirkan dan domisil di dalam Negeri Sembilan; atau*
- (ii) Pemohon seorang mualaf, dia hendaklah memeluk Agama Islam di dalam Negeri Sembilan, telah berdaftar mengikut peruntukan seksyen 111 dan domisil di dalam Negeri Sembilan.*

[10] Kami telah meneliti Alasan Penghakiman YA Hakim Bicara di hal. 7-9 dalam menolak permohonan Perayu kerana Perayu tidak mempunyai *locus standi* disebabkan Perayu tidak dilahirkan di Negeri Sembilan, sebaliknya Perayu lahir di Hospital Daerah Kulim, Kedah. Fakta ini jelas boleh dilihat melalui dokumen yang telah diekshibitkan oleh Perayu iaitu Sijil Kelahiran yang ditandakan sebagai **HG-2**.

[11] Merujuk kepada Kamus Undang-Undang; Kuala Lumpur: terbitan Fajar Oxford. hlm. 330, kami ingin menyentuh berkaitan dengan maksud perkataan “*locus standi*” ia bermaksud tempat untuk berdiri iaitu hak untuk mengambil tindakan atau mencabar sesuatu keputusan. Dalam isu *locus standi* ini, ia telah disentuh oleh Tun Salleh Abas di dalam kes Kerajaan Malaysia lawan Lim Kit Siang [1988] 1 CLJ Rep 63; [1988] 2 MLJ 12 yang menyatakan –

*“Every legal system has a built-in mechanism to protect its judicial process from abuse by busy-bodies, cranks and other mischief-makers by insisting that a plaintiff should have special interest in the proceedings which he institutes. This special interest is a nexus between him and the party against who he brings his complaints to Court and is known as locus standi.”*

[12] Bidang kuasa sesebuah Mahkamah sebenarnya telah lama disentuh oleh perundangan Islam atau Hukum Syarak. Antaranya sebagaimana dinyatakan oleh Muhammad Salam Madkur di dalam kitabnya berjudul Al-Qada’ fil Islam, terbitan Matbaah Al ‘Aalamiyah, Kaherah, 1964, hal. 54 beliau menyebutkan –

هو أن يخصص ولي الأمر القاضى عند تقليده القضاء أو بعد ذلك بنوع معين من القضايا، كالأحوال الشخصية، أو المدنى، أو التجارى، أو الجنائى إلى غير ذلك، فلا يصح له أن ينظر فى نوع آخر غيره

*Maksudnya: “Bidangkuasa mengikut jenis kes ialah pemerintah mengkhususkan bidangkuasa ke atas seseorang Hakim semasa perlantikan Hakim itu atau selepas perlantikan dibuat dengan menentukan bahawa Hakim itu mempunyai bidangkuasa tertentu sahaja seperti diberi bidangkuasa bagi mengendalikan undang-undang diri, undang-undang sivil, undang-undang perdagangan atau bagi undang-undang jenayah dan seumpamanya; oleh yang demikian Hakim itu hanya berbidangkuasa bagi kes-kes yang dianya diberi bidangkuasa sahaja dan Hakim itu tidak boleh melaksanakan bidangkuasa lain yang tidak diberi kepadanya.”*

[13] Dalam kitab Dr. Abdul Karim Zaidan dalam kitabnya Nizam al-Qadha’ Fi Syariat al-Islamiyyah, Muassah al-Risalah, Beirut, Lebanon, cetakan ketiga, 1418H/1997M, hal. 39-40 menjelaskan bahawa seseorang hakim itu adalah

merupakan naib khalifah kepada khalifah (penguasa negara) yang melantiknya. Sebagai naib khalifah, kuasa yang diperolehinya adalah setakat yang diberi mandat kepadanya. Dari sinilah bidangkuasa seseorang hakim itu menerima taqyid (pembatasan), itlaq (tanpa had), umum dan khusus dari segi masa, tempat, pihak yang bertikai dan jenis-jenis pertikaian. Para fuqaha menggunakan istilah al-taqlid al-'am wa al-taqlid al-khas bagi menunjukkan bidangkuasa seseorang hakim.

[14] Berdasarkan ulasan di atas dan peruntukan undang-undang, kami berpuashati bahawa YA Hakim Bicara tidak terkhilaf memutuskan bahawa Perayu tidak mempunyai *locus standi* untuk memfailkan permohonannya di Mahkamah Tinggi Syariah Negeri Sembilan kerana terdapat halangan di sisi undang-undang. Maka adalah wajar untuk Hakim Bicara menolak permohonan tersebut.

**KEPUTUSAN**

SETELAH kami meneliti Notis Permohonan dan Afidavit Pemohon serta hujahan Perayu, MAKA kami dengan sebulat suara memutuskan seperti yang berikut:

1. Rayuan Perayu adalah **DITOLAK**.

Dibaca dan ditandatangani oleh:-

- .....
1. **YAA DATO' ABAS BIN NORDIN**  
Pengerusi  
Panel Hakim Mahkamah Rayuan Syariah Negeri Sembilan

Dipersetujui oleh:-

- .....
2. **YAA DATO' DR. HAJI MOHD. NA'IM BIN HAJI MOKHTAR**  
Panel Hakim Mahkamah Rayuan Syariah Negeri Sembilan

Dipersetujui oleh:-

- .....
3. **YA DATO' HAJI HUSSIN BIN HAJI HARUN**  
Panel Hakim Mahkamah Rayuan Syariah Negeri Sembilan